

四庫全書

史部

欽定四庫全書

欽定續通志卷二十二

晉紀

高祖

出帝

高祖皇帝其父臬振鷄本出於西邊自朱耶歸唐從朱耶入居陰山其後晉王李克用起于雲朔之間臬振鷄以善騎射嘗從晉王征伐有功官至洺州刺史臬振鷄生敬瑭其姓石氏不知其得姓之始也敬瑭為人沉厚

寡言明宗愛之要以女是為魏國公主由是常隸明宗  
帳下號左射軍莊宗已得魏梁將劉鄩急攻清平莊宗  
馳救之兵未及陣為鄩所掩敬瑭以十餘騎橫槊馳擊  
取之以旋莊宗拊其背而壯之手啗以酥啗酥北俗所  
重由是名動軍中天祐十五年莊宗戰于胡柳前鋒周  
德威戰死敬瑭以左射軍從明宗復擊敗梁兵明宗戰  
胡盧套楊村為梁兵所敗敬瑭常脫明宗於危及從攻  
鄆州復與廢帝先登功多趙在禮之亂明宗討之至魏

而兵變明宗初欲自歸于天子明已所以不反者敬瑭  
獻計曰豈有上將與叛卒入賊城而他日得保無恙者  
乎且猶豫者兵家大忌不如速行願得騎兵三百先攻  
汴州夷門天下之要害也得之可以成事明宗然之與  
之驍騎三百自白馬渡河為前鋒明宗遂入汴莊宗自  
洛後至不得入而兵皆潰去莊宗西還明宗以敬瑭為  
前鋒趣汜水且收其散卒莊宗遇弒明宗入立拜敬瑭  
保義軍節度使賜號竭忠建策興復功臣兼六軍諸衛

副使在陝為政以廉聞是時諸侯多不奉法鄧州陶玘  
亳州李鄴皆以贓污論死明宗下詔書褒廉吏普州安  
崇阮洺州張萬進耀州孫岳等以諷天下而以敬瑭為  
首天成二年從幸汴州為御營使拜宣武軍節度使侍  
衛親軍馬步軍都指揮使六軍副使如故改賜耀忠匡  
定保節功臣三年徙鎮天雄充興唐尹同平章事尋為  
東川行營都招討使討董璋不克而還復兼六軍諸衛  
副使徙鎮河陽三城未行而契丹吐渾突厥皆入寇是

時秦王從榮統六軍敬瑭疑其必及禍不欲為其副乃自請行及制出不落副使輒復辭行明宗數責大臣問誰可行者范延光趙延壽等卒以敬瑭為請乃拜河東節度使大同彰國振武威塞等軍蕃漢馬步軍總管落六軍副使乃行愍帝應順元年加中書令二月徙鎮成德三月廢帝進逼京師愍帝急召敬瑭赴闕敬瑭至衛州而愍帝出奔遇敬瑭于道敬瑭殺帝從者百餘人幽帝於衛州而去初敬瑭與廢帝俱事明宗心不相悅及

廢帝即位不得已來朝而內顧自疑欲求歸鎮且難言之時敬瑭久病羸瘠乃益為灸灼滿身太后及公主屢為之言帝亦見其多病不以為虞乃復以為河東節度使時契丹屢寇北邊敬瑭將大軍屯忻州而屯兵忽變擁敬瑭呼萬歲敬瑭懼斬三十餘人而後止帝聞之益

疑敬瑭

依舊史及通鑑改輯

天福元年五月徙敬瑭鎮天平敬瑭大懼謂其將佐曰吾之再來河東也主上面許終身不除代今無故而遷

是疑吾反也且太原地險而粟多吾當內檄諸鎮外求  
援于契丹可乎桑維翰劉知遠等共以為然乃上表論  
廢帝非明宗子不當立請立許王從益為明宗嗣廢帝  
下詔削奪敬瑭官爵命張敬達等討之敬瑭求援於契  
丹九月契丹耶律德光將五萬騎入自鴈門辛丑與張  
敬達戰于晉陽敬達大敗敬瑭夜出北門見德光約為  
父子十一月丁酉即皇帝位于太原國號晉以幽涿薊  
檀順瀛莫蔚朔雲應新媯儒武寰州入于契丹己亥大



敕改元以掌書記桑維翰為翰林學士禮部侍郎知樞密  
使事閏月丙寅以翰林學士承旨戶部侍郎趙瑩為門  
下侍郎桑維翰為中書侍郎並同中書門下平章事魚  
樞密使甲戌趙德鈞及其子延壽叛于唐來降契丹鏖  
之以歸己卯帝次河陽節度使葛從簡叛于唐來降辛  
巳至自太原盧文紀姚顗罷甲申大赦殺張延朗劉延  
朗赦房嵩十二月乙酉如河陽追降唐帝為庶人丁亥  
以司空馮道兼門下侍郎同中書門下平章事己丑曹

州將石重立殺其刺史鄭玩辛卯求直言癸巳成德軍

將秘瓊逐其節度副使李彥珂同州裨將門鐸殺其將

楊漢濱庚子天平軍節度使王建立殺其副使李彥贇

二年春正月乙卯日有食之

實錄作五月甲寅朔乙卯日食十國紀年蜀乙卯朔

日食癸亥安遠軍節度使盧文進叛降于吳丁卯天雄軍

節度使范光毅齊州防禦使秘瓊戊寅以兵部侍郎

李崧為中書侍郎同中書門下平章事樞密使封唐宗

室子為公及隋鄭公為二王後以周介公倫三恪二月

丁酉契丹使者來詔開荒田三月庚辰如汴州夏四月  
丁亥赦囚蠲民租賦趙瑩使于契丹辛卯宣武軍節度  
使楊光遠進助國錢契丹使者來五月壬戌求直言丁  
丑追尊祖考為皇帝妣為皇后高祖璟諡曰孝安廟號  
靖祖祖妣秦氏諡曰孝安元曾祖彬諡曰孝簡廟號肅  
祖祖妣安氏諡曰孝簡恭祖昱諡曰孝平廟號睿祖祖  
妣來氏諡曰孝平獻考昭雍諡曰孝元廟號獻祖妣何  
氏諡曰孝元懿六月癸未契丹使者來范延光反丁酉

傳箭于義成軍節度使符彥饒丁未以楊光遠為魏州四面行營都部署東都巡檢張從賓反留守判官李遐死之以奉國都指揮使侯益護聖都指揮使杜重威討之

從賓寇河陽殺皇子重信寇河南殺皇子重入

新紀又作信信

作又兩相違舛燕祿舊史及家人傳正之

秋七月從賓陷汜水關殺巡檢使

宋廷浩壬子右衛大將軍尹暉叛伏誅右監門衛大將軍婁繼英叛附于張從賓義成軍亂殺戍將侍衛馬步軍都指揮使白奉進甲寅戍將奉國指揮使馬萬執符

彥饒歸于京師命殺之于赤岡乙卯以楊光遠為魏州  
行營都招討使辛酉杜重威克汜水關壬申楊光遠克  
博州丙子安州叱防指揮使王暉殺其節度使周瓌

新紀

作周瓌傳李  
金全傳改

右衛上將軍李金全討之八月丙申靜難

軍節度使安叔千進添都馬乙巳赦非死罪囚及張從  
賓符彥饒王暉餘黨九月禁喪葬用樂冬十月辛巳禁  
造甲兵

三年春二月戊戌諸鎮皆進物以助國三月丁丑禁私

造銅器秋七月辛酉以皇業錢作受命寶八月戊寅以馮道及左僕射劉昫為契丹冊禮使壬午澶州刺史馮暉降而戍許御署官遷己丑蠲水旱民稅辛丑歸伶官于契丹九月己酉赦范延光己未歸靜鞭官劉守威金吾勣契官王殷司天鵲叫學生殷暉于契丹己巳赦魏州蠲民稅是月以宣徽南院使劉處讓為樞密使冬十月戊寅契丹使者來奉冊曰英武明義皇帝庚辰升汴州為東京以洛陽為西京雍州為晉昌軍戊子右金吾

衛大將軍馬從斌使于契丹己未契丹使者來戊戌大赦十一月辛亥升廣晉府為鄴都壬戌除鑄錢令十二月丙子封子重貴為鄭王是歲契丹改國號

曰遼

謹按通鑑輯覽

御批契丹之改遼與拓跋之稱魏體例無二乃綱目于拓跋書魏契丹則不書遼蓋由司馬先以宋臣作通鑑其時不敢稱遼以敵宋綱目遂仍其舊初非別有深文也乃劉友益尹起莘輩拘牽好異謂書魏所以進之書契丹所以外之抑如史家記事當以春秋為法春秋前書荆後書楚非例以義起耶即以綱目言之東晉時如慕容之稱燕苻姚之稱秦以至武都河西雖彈丸蕞爾而列國之書法具在何所容其進退者腐儒曲說支離真所云燭籠添骨莫明

益陣烏足興言  
傳信之年哉

四年春正月盜發愍皇帝墓辛亥以澶州防禦使張從  
恩為樞密副使旌深州民李自倫門閭三月丙辰頒調  
元歷靈州戍將王彥忠以懷遠城反己未彥忠降供奉  
官齊延祚殺之夏四月甲申廢樞密使秋七月庚子朔  
日有食之丙辰復禁鑄錢閏月壬申桑維翰罷八月西  
戎寇涇州彰義軍節度使張彥澤敗之九月丁丑遼使  
者來癸未封李從益為郇國公以奉唐後冬十二月乙



亥立唐高祖太宗莊宗明宗愍帝廟於西京戊子邈使者  
來吐蕃罷延族來附

五年春正月丁卯朔除民公私債三月除則刑夏四月  
甲子邈使者來五月丙戌安遠軍節度使李金全叛附  
于唐六月癸卯唐將李承裕入于安州甲辰安遠軍節  
度使馬全節及承裕戰于城南敗之丁巳克安州執李  
承裕殺之秋八月丁酉闕稼于西郊己未西京留守楊  
光遠殺太子太師致仕范廷光九月丁卯以翰林學士

承旨戶部侍郎和凝為中書侍郎同中書門下平章事辛巳閱稼于沙臺冬十月丁未遼使者來

六年春正月丙寅吐谷渾背遼來奔不納三月除民二年至四年以前稅夏四月己未遼使者來秋八月壬辰如鄴都開封尹鄭王重貴留守東京以宣徽南院使張從恩為東京內外兵馬都監壬寅大赦甲寅光祿卿張澄使于遼九月乙亥前安國軍節度使楊彥詢使于遼冬十月山南東道節度使安從進反十一月丁丑以西

京留守高行周為襄州行營都部署以討之十二月丙戌以鄭王重貴為廣晉尹徙封齊王行營先鋒使郭金海及安從進戰于唐州敗之成德軍節度使安重榮反以天平軍節度使杜重威為鎮州行營招討使丙申遼使者來戊戌杜重威及安重榮戰于宗城敗之

七年春正月丁巳克鎮州安重榮伏誅赦廣進庚午遼使者來三月歸德軍節度使安彥威塞決河于滑州夏五月乙巳尊皇太妃劉氏為皇太后六月乙丑皇帝崩

于鄴都之保昌殿年五十三諡曰聖文章武明德孝皇  
帝廟號高祖陵曰顯陵

高祖天福七年

其元年即後  
唐清泰三年

出帝諱重貴高祖兄子也父敬儒為唐莊宗騎將早卒  
高祖以重貴為子高祖六子五子皆早死而重睿幼故  
重貴得立重貴少而謹厚善騎射高祖使博士王震教  
以禮記久之不能通大義謂震曰此非我家事也高祖  
為契丹所立將引而南謀以一子留守太原德光使盡

出諸子擇之指重貴曰此眼大者可也遂拜金紫光祿  
大夫行太原尹北京留守知河東節度事天福二年拜  
左金吾衛上將軍三年冬為開封尹封鄭王加太尉同  
中書門下平章事六年高祖幸鄴留守東京已而為廣  
晉尹徙封齊王七年六月乙丑高祖崩即位于柩前丁  
卯尊皇太后曰太皇太后皇后曰皇太后庚午使左驍  
衛將軍石德超以御馬二匹祭于相州之西山如京使  
李仁廊使于遼

按如京使官名也史別本京下有師字誤今刪

遼使來丙子以

馮道為大行皇帝山陵使門下侍郎竇貞固為副太常卿崔胤為禮儀使戶部侍郎呂琦為鹵簿使御史中丞王易簡為儀仗使己卯四方館使宋崇節右金吾衛大將軍梁言使于遼秋七月壬辰太皇太后劉氏崩輟朝三日丁酉使石德超撲馬于相州之西山庚子大赦甲辰遼使者來八月戊午高行周克襄州庚申天平軍節度使景延廣義成軍節度使李守貞彰德軍節度使郭謹進錢粟助山陵甲子遼使者來癸酉又遣使者來九月

辛丑以李守貞為大行皇帝山陵都部署冬十月己未  
遣使者來十一月復遣使者來庚寅葬高祖皇帝于顯  
陵己亥牛羊使董殷使于遼辛丑蠲高祖靈車所過民  
租之半十二月庚午北京留守劉知遠進百頭穹廬遼  
使者來辛未又遣使者來

八年春正月遼使者來二月壬子以景延廣為御營使  
己未車駕發鄴都赦廣晉府囚庚申次澶州赦囚乙丑  
至自鄴都庚午寒食望祭顯陵于南莊焚御衣紙錢三月

已卯趙瑩罷以晉昌軍節度使桑維翰為侍中辛丑引  
進使太府卿孟承誨使于遼夏四月戊申朔日有食之庚  
午董殷使于遼遣供奉官張福率威順軍捕蝗于陳州  
五月泰寧軍節度使安審信捕蝗于中都丁亥追封皇伯

敬儒為宋王

按司馬先通鑑及朱子綱目皆無追封皇伯敬儒為宋王之語此歐陽修特筆也歐

陽修曰出帝立不以正臣其父而爵之以欺天下敬儒為出帝本生父從唐舊制亦無稱皇伯之禮至于尊秦國夫人安氏為太妃此尤不經之甚者夫帝既為高祖後矣既伯其父而王之矣而復尊生母為皇太妃後世將以為雖之妃乎五代喪禮居臣罔識經權如周世宗令碑也而于崇守禮父子之間臣之以卿外之曰男不能



曲盡情理以至依法全思識者猶不能無癸卯馮道罷

譏焉若出帝者又何足與之言倫理也哉甲辰旱蝗大赦六月庚戌祭蝗于臯門癸亥遣供奉官

帥奉國軍捕蝗于京畿辛未祐借民粟殺藏粟者秋七

月丁酉射于南莊遣使者來甲辰遣供奉官李漢超帥

奉國軍捕蝗于京畿八月丁未募民捕蝗易以粟辛亥

檢民青苗九月戊寅尊泰國夫人安氏為皇太妃丁亥

追冊魏國夫人張氏為皇后

張氏帝之元妃也新史于紀不書而家人傳又不載

其姓氏疎矣

丙申辛大年莊及景延廣第冬十月戊申

茲據舊史

立馮氏為皇后壬子畋于近郊如沙臺丙寅遼使者來  
庚午括借民粟十一月己卯董殷使于遼甲申如八角  
關馬牧乙未遼史者來戊戌齊州刺史楊承祚奔于青州  
十二月癸丑給事中邊光範登州刺史郭彥威使于遼平  
盧軍節度使楊光遠反淄州刺史翟進宗死之

開運元年春正月甲戌朔遼侵滄州己卯陷貝州庚辰  
歸德軍節度使高行周為北面行營都部署遣入鴈門  
侵代州辛巳殿直王班使于遼至于鄴都不得進而復

壬午以前靜難軍節度使李周留守東京景延廣為御營使自將以禦遼丙戌遼侵黎陽辛卯講武于澶州趙

延壽以遼人寇南樂

舊書于晉紀凡遼人稱兵創書曰寇恭靖通鑑輯覽

御批彼時中國已瓜分瓦解不成正統而石晉得國之本又由于父事遼及重賁繼止好事者賴以書臣為耻然稱孫之表仍無虛日以是稱禍即問惡朕無識之人以祖寇孫有不听然而笑者哉是當用西國五代之文書後以正其悞誠

折衷為

至當千古不易之通義也惟是趙延壽托身于遼藉遼以殘父母之邦則其喪心失計自有不可得而諱者故于此仍書曰寇以著其惡甲午以劉知

遠為幽州道行營招討使括馬丙申遼侵黎陽辛丑劉

知遠及遼偉王戰于秀容敗之博州刺史周儒叛降于遼二月戊申前軍都虞候李守貞及遼戰于馬家渡敗之癸丑北面行營都虞候馬全節及遼戰于北平敗之三月癸酉又敗之于戚城遼師還己丑冀州刺史白從暉及遼戰于衡水敗之癸巳藉民為武定軍夏四月遼陷德州沿河巡檢梁進敗之取德州甲寅至自澶州赦京師己未馬全節及遼戰于定豐敗之辛酉率借民財五月戊寅李守貞討楊光遠丁亥以鄴都留守張從恩

為貝州行營都部署辛卯以李守貞為青州行營都部署六月克淄州丙午復署樞密使丁未以桑維翰為中書令充樞密使秋七月辛未朔大赦改元己丑以太子太傅劉昫守司空兼門下侍郎同中書門下平章事八月辛丑以劉知遠為北面行營都統順德軍節度使杜威為都招討使戊辰旌項城民史仁詡門閭九月庚午朔日有食之丙子遼侵遂城樂壽代州刺史白文珂及遼戰于七里烽敗之冬十月庚戌以武寧軍節度使趙

在禮為北面行營副都統鄴都留守馬全節為副招討使十二月己亥朔射兔于臯門丁巳楊承勲因其父光遠以降殺之閏月乙酉赦青州因遼侵恒州

二年春正月遼陷秦州

新紀作秦州並據馬全節傳及五代會要改下同

壬子

馬全節及遼戰于榆林兩軍皆潰戊午如南莊張從恩留守東都辛酉以高行周為御營使遼師還二月己巳如黎陽橫海軍節度使田武為東北面行營都部署以禦遼丙子大閱于戚城丙戌閱馬於鐵丘丙申以端明

殿學士戶部侍郎馮玉為戶部尚書樞密使三月戊戌

遼陷祁州刺史沈斌死之

此事通鑑在二月熙寧舊史俱作三月戊戌蓋據奏到之

日丁未敗于戚城庚戌馬全節克泰州辛亥易州戌將

孫方諫及遼戰于狼山敗之甲寅杜威克滿城乙卯克

遂城庚申杜威及遼戰于陽城敗之追奔至于衛村又

敗之夏四月戊寅勞旋于戚城己卯勞旋于王莽河甲

申至自澶州赦左右軍囚庚寅大賞軍功五月丙申朔

大赦丙午如南莊六月丁卯射于繁臺

纂誤引此作射屬于繁臺謂屬

字當見兎字蓋前微皆作射兎而六月又  
非射鴈時也今各本并無鴈字姑仍之 辛杜威第秋

八月甲子朔日有食之丙寅和凝罷以馮玉為中書侍郎同中書門下平章事辛未閱馬于茂澤陂丁丑括馬九月己亥閱馬于萬龍岡辛李守貞第冬十月戊寅射兎于硯臺十一月己巳射兎于臯門如沙臺十二月丁丑畋于郊丁亥桑維翰罷以開封尹趙瑩為中書令李崧守侍中樞密使

三年春二月壬戌朔日有食之壬午射鴈于板橋如南



莊夏六月孫方詠以狼山叛附于遼遼侵定州己丑以  
李守貞為行營都部署義成軍節度使皇甫遇為副秋  
九月辛丑行營馬軍排陣使張彥澤及遼戰于新興敗  
之癸卯劉知遠及遼戰于朔州敗之冬十月辛未以杜  
威為北面行營都招討使李守貞為兵馬都監十一月

永清軍節度使梁漢璋及遼戰于瀛州敗績

新紀永清作永靜考

是時無永靜軍故據舊史

遼侵鎮定十二月己未杜威軍于中渡士

成奉國都招撫使王清及遼戰于泅沱敗績死之杜威

李守貞張彥澤以其軍叛降于遼庚午射兔于沙臺壬申張彥澤犯京師殺開封尹桑維翰帝北行遼滅晉

出帝天福一年

仍高祖年號稱八年

開運三年凡四年

右晉二帝合十一年

欽定續通志卷二十二

欽定四庫全書

欽定續通志卷二十三

漢紀

高祖

隱帝

高祖皇帝姓劉氏諱暉初名知遠其先沙陀部人也其  
後世居于太原知遠弱不好弄嚴重寡言面紫色目多  
白睛凜如也與晉高祖俱事唐明宗為偏將明宗及梁  
人戰德勝晉高祖馬甲斷梁兵幾及之知遠以所乘馬

授高祖復取高祖馬殿而還高祖德之高祖留守北京以知遠為押衙潞王從珂反愍帝出奔高祖自鎮州赴京師遇愍帝于衛州止傳舍知遠遣勇士石敢袖鐵槌侍高祖以虞變高祖與愍帝議事未決左右欲兵之知遠擁高祖入室敢與左右格鬪而死知遠即以兵盡殺愍帝左右置帝傳舍而去廢帝入立高祖復鎮河東已而有隙高祖將舉兵知遠與桑維翰密為高祖謀畫贊成之高祖即位於太原以知遠為侍衛親軍都虞候領

保義軍節度使契丹耶律德光送高祖至潞州臨決指  
知遠曰此都軍甚操刺無大故勿棄之天福二年遷侍  
衛馬步軍都指揮使領忠武軍節度使已而以杜重威  
代知遠領忠武徙知遠領歸德知遠恥與重威同制杜  
門不出高祖怒欲罷其兵職宰相趙瑩以為不可高祖  
乃遣端明殿學士和凝就第宣諭知遠乃受命五年徙  
鄴都留守九月朝京師高祖幸其第六年拜河東節度  
使北京留守七年高祖崩出帝立與遼絕盟用兵北方

以知遠從高祖起太原有佐命功勲位已高疑其幸國  
家多故而有異志每優尊之拜中書令封太原王幽州  
道行營招討使又拜北面行營都統開運二年封北平  
王三年加守太尉然王未嘗出兵遼逼瀋州別遣偉王  
攻鴈門王敗之于秀容八月殺吐渾白承福等族取其  
貲鉅萬良馬數千四年正月德光入京師出帝北遷王  
遣牙將王峻奉表于德光德光呼之為兒賜以木柅遼  
法優禮大臣則賜之如中國凡杖峻持柅歸遼人望之

皆辟道峻還為王言德光必不能有中國乃議建國二

月戊辰河東行軍司馬張彥威等上牋勸進辛未皇帝

即位于太原稱天福十二年

天福晉高祖年號也天福止八年改元開運至此四

年矣漢雖建國而未有國號又稱晉年號捨開運而追緒天福為十二年初無義理但書其實爾磁州

賊首梁暉取相州來歸武節都指揮使史弘肇取代州

殺其刺史王暉晉州將藥可儔殺其守將駱從朗及括

錢使諫議大夫趙熙來歸辛巳陝州留後趙暉潞州留

後王守恩來歸三月丙戌蠲河東雜稅辛卯延州軍亂



逐其節度使周密壬辰丹州指揮使高彥詢以其州來  
歸壬寅德光北去以其將蕭翰為宣武軍節度使守汴  
州夏四月己未以右都押衙楊邠為樞密使蕃漢兵馬  
都孔目官郭威權樞密副使遼陷相州殺梁暉癸亥立  
魏國夫人李氏為皇后甲子以河東節度判官蘇逢吉  
觀察推官蘇禹珪並為中書侍郎同中書門下平章事  
乙丑侍衛親軍步軍都指揮使史弘肇取潞州戊辰奉  
國指揮使武行德以河陽來歸史弘肇取澤州丙子耶

律德光卒于欒城其衆入于鎮州五月甲午以太原尹

劉崇為北京留守丙申車駕發太原蕭翰遜歸以郇國

公李從益知南朝軍國事戊申次絳州刺史李從朗來

歸六月丙辰次洛陽

新紀作河陽此從舊紀

殺李從益及其母于

京師甲子至于京師戊辰改國號漢赦罪人蠲民稅是

夏劉昫薨秋閏七月前天雄軍節度使杜重威反

杜重威於

晉出帝時避出帝名去重至漢而復之

庚午以天平軍節度使高行周為

鄴都行營都部署以討之

舊紀是年七月以宋州節度使高行周為鄴都留守高行

周傳則云漢祖入汴代李守貞為天平節度使  
鄴平授鄴都留守與紀不同今依傳及新紀 庚辰追

尊祖考為皇帝妣為皇后高祖湍諡曰明元廟號文祖  
祖妣李氏諡曰明貞曾祖昂諡曰恭僖廟號德祖祖妣  
楊氏諡曰恭惠祖侯諡曰昭憲廟號翼祖祖妣李氏諡  
曰昭穆考瑱諡曰章聖廟號顯祖妣安氏諡曰章懿以  
漢高皇帝為高祖光武皇帝為世祖皆不祧八月護聖  
指揮使白再榮逐遼人以鎮州來歸丙申安國軍節度  
使薛懷讓殺遼將劉鐸入于邢州九月甲戌以吏部尚

書尚貞固守司空兼門下侍郎翰林學士中書舍人李  
濤為中書侍郎並同中書門下平章事庚辰帝北征冬  
十月甲申次章城赦河北十一月壬申杜重威降十二  
月癸巳至自鄴都

乾祐元年春正月乙卯大赦改元己未更名冑丁丑皇  
帝崩于萬歲殿年五十四諡曰睿文聖武昭肅孝皇帝  
廟號高祖陵曰睿陵

高祖天福一年

仍晉高祖年號

乾祐一年凡二年

隱皇帝諱承祐高祖第二子也母曰昭聖皇后李氏高祖即位拜右衛上將軍大內都點檢魏王承訓長而賢高祖愛之方屬以為嗣而承訓薨高祖悲哀疾劇乃以承祐屬諸將相宰相蘇逢吉曰皇子承祐未封王請亟封之未及封高祖崩祕不發喪殺杜重威

乾祐元年二月辛巳封承祐周王是日皇帝即位于柩前壬辰右衛大將軍鳳翔巡檢使王景崇及蜀人戰于大散關敗之癸巳大赦三月壬戌以竇貞固為大行皇

帝山陵使吏部侍郎段希堯為副太常卿張昭為禮儀使御部侍郎盧價為鹵簿使御史中丞邊蔚為儀仗使丁丑李濤罷護國軍節度使李守貞反陷潼關夏四月辛巳陝州兵馬都監王王克潼關壬午永興軍將趙思綰叛附于李守貞客省使王峻帥師屯于關西以楊邠為中書侍郎兼吏部尚書同中書門下平章事郭威為樞密使以鎮寧軍節度使郭從義為永興軍兵馬都部署戊子保義軍節度使白文珂為河中兵馬都部署王

峻為都監乙未以待衛步軍都指揮使尚洪遷為西面  
行營都虞候六月戊寅朔日有食之秋七月戊申彰德  
軍節度使王繼弘殺其判官張易庚申以郭威同中書  
門下平章事癸亥遼莫州刺史王彥徽來奔庚午殺成  
德軍副使張鵬乙亥王景崇叛附于李守貞八月壬午  
郭威討李守貞九月尚弘遷及趙思綰戰敗績冬十一  
月甲寅殺太子太傅李崧滅其族壬申葬高祖皇帝于  
睿陵十二月己卯彰武軍節度使高允權殺太子太師

致仕劉景嚴

二年

按徐無黨曰隱帝即位至此宜改元而不改元帝名承祐年號乾祐舉國臣民共稱而不改避當時

莫大之失或曰承天之祐禮運語也隱帝名當是祐字五代雖不知禮何至并此而昧之祐字傳寫誤耳春

正月乙巳朔大赦二月丙子蠲民紐配租夏五月李守

貞之將周光遜降乙丑趙思綰降六月癸酉朔日有食

之秋七月丁巳郭威殺華州留後趙思綰于京兆甲子

克河中八月郭從義殺前永興巡檢喬守溫丙戌郭威  
使來獻俘冬十月遼人寇趙魏羣臣進添都馬遼陷內



兵已丑郭威及宣徽南院使王峻伐遼十一月遼師還  
三年春正月西面行營都部署趙暉克鳳翔丙午郭威  
進添都馬士子趙暉獻馘俘二月甲戌旌汝陰民麴溫  
門閭三月己酉寒食望祭于南御園夏四月壬午郭威  
以樞密使為天雄軍節度使冬十一月甲子朔日有食  
之丙子殺楊邠及侍衛親軍都指揮使史弘肇三司使  
王章皆滅其族郭威反庚辰義成軍節度使宋延渥叛  
附于威壬午威犯封丘秦寧軍節度使慕容彥超軍于

七里店癸未勞軍于北郊甲申勞軍于劉子陂慕容彥  
超及郭威戰敗績開封尹侯益叛降于威郭允明反乙  
酉皇帝崩蘇逢吉自殺漢亡

隱帝乾祐二年

仍高祖  
年號

右漢二帝合四年

欽定續通志卷二十三

欽定四庫全書

欽定續通志卷二十四

周紀

太祖

世宗

恭帝

太祖皇帝姓郭氏諱威邢州堯山人也父簡事晉為順  
州刺史劉仁恭攻破順州簡見殺威少孤依潞州入常  
氏潞州留後李繼韜募勇敢士為軍卒威年十八以勇  
力應募為人負氣好使酒繼韜特奇之威嘗遊於市市

有屠者常以勇服其市人威醉呼屠者使進凡割肉割  
不如法叱之屠者披其腹示之曰爾勇者能殺我乎威  
即前取刀刺殺之一市皆驚威頗自如為吏所執繼韜  
惜其勇陰縱之使亡已而復召置麾下其後莊宗滅梁  
繼韜以叛誅死其麾下兵悉隸從馬直威以通書算補  
為軍吏好讀聞外春秋略知兵法後為侍衛軍吏漢高  
祖為侍衛親軍都虞候尤親愛之高祖既歷諸鎮嘗以  
威從契丹滅晉漢高祖起太原即皇帝位拜威樞密副

使乾祐元年正月高祖疾大漸以隱帝託威及史弘肇等隱帝即位拜威樞密使是歲三月河中李守貞永興趙思綰鳳翔王景崇相次反隱帝遣白文珂郭從義常思等分討之久皆無功隱帝謂威曰吾欲煩公可乎對曰臣不敢請亦不敢辭惟陛下命乃加威同中書門下平章事充西面軍前招慰安撫使諸軍皆受節度威居軍中延見賓客褒衣博帶及臨陣行營幅巾短後與士卒無異上所賜予與諸將會射恣其所取其餘悉以分

賜士卒由是將士咸歸心於威威至河中自柵其城東  
思柵其南文珂柵其西調五縣十二萬人築連壘以護  
三柵諸將皆以為守貞窮寇破在旦夕不宜勞人如此  
威不聽已而守貞數出兵擊連壘壘壞威輒補之守貞  
輒復出擊每出必有亡失久之城中兵食俱盡威曰可  
矣乃治攻具為期日四面攻之破其羅城守貞與妻子  
自焚死而思綰景崇亦相次平隱帝勞威以玉帶加檢  
校太師兼侍中威辭曰臣事先帝見功臣多矣未嘗以

玉帶賜之且臣將兵在外凡鎮安京師供億所須使軍食不乏皆諸大臣居中者之力也臣安敢獨膺此賜隱帝以威為賢於是悉召楊邠史弘肇蘓逢吉蘇禹珪竇貞固王章等皆賜以玉帶威乃受又推功大臣請加爵賞於是加貞固司徒逢吉司空

新紀作貞固司空逢吉司徒茲據舊紀禹

珪邠左右僕射已而又曰此特漢廷親近之臣耳諸宗室方鎮外暨荆浙湖南皆未及也由是濫賞遍於天下是冬遼人寇邊威以樞密使北伐至魏州遼師引出三年



二月師還四月拜威鄴都留守天雄軍節度使仍以樞密使之鎮宰相蘇逢吉以謂故事樞密使無以藩鎮領者與史弘肇等固爭久之卒以樞密使行仍詔河北諸州皆聽威節度是時隱帝年少嬖倖寢用事將相不睦帝與李業等謀已殺史弘肇等乃詔鎮寧軍節度使李弘義殺侍衛步軍指揮使王殷於澶州又詔侍衛馬軍指揮使郭崇殺威及宣徽使王峻於魏詔書先至濱州弘義恐事不果反以詔書示殷殷即馳遣人告威已而

詔殺威峻使者亦馳騎至威匿詔書召樞密使院吏魏仁浦謀於卧内仁浦勸威反教威倒用留守印更為詔書詔威誅諸將校以激怒之將校皆憤然效用十一月丁丑威遂舉兵渡河隱帝遣開封尹侯益保大軍節度使張彥超客省使閻晉卿等率兵拒威又遣内養驚脫覘威所嚮驚脫為威所得威乃附脫奏請縛李業等送軍中隱帝得威奏以示業等業等皆言威反狀已白乃悉誅威家屬於京師庚辰威至滑州義成軍節度使宋

延涯叛於漢來降壬午犯封丘甲申及泰寧軍節度使慕容彥超戰於劉子陂彥超敗奔於兗州隱帝方出勞軍為亂兵所弑丙戌威入京師縱火大掠戊子率百官朝太后於明德門請立嗣君太后下令文武百寮六軍將校議擇賢明以承大統庚寅威率百官詣明德門請

立武寧軍節度使贇為嗣遣太師馮道迎贇於徐州

新紀

武寧作泰寧然泰寧乃兗州軍號非徐州也茲據職方考

辛卯請太后臨朝聽政以

王峻為樞密使翰林學士兵部侍郎范質為副使鎮州

邢州言有北寇十二月甲午朔威以大軍北征癸丑至  
澶州而旋王峻遣侍衛馬軍都指揮使郭崇以騎兵七  
百逆劉贊於宋州殺之其將輩廷美楊溫為贊守徐州  
戊午威營於臯門漢宰相竇貞固蘇禹珪來勸進庚申  
太后制以威監國

廣順元年春正月丁卯皇帝即位大赦改元國號周已  
巳上漢太后尊號曰昭聖皇太后戊寅漢北京留守劉  
崇自立於太原已卯以馮道為中書令二月丁未遼使

者來癸丑寒食望祭於蒲池丁巳尚書左丞田敏使於  
遼三月甲戌武寧軍節度使王彥超克徐州夏四月甲  
午立夫人董氏為德妃五月辛未追尊祖考為皇帝妣  
為皇后高祖璿謚曰睿和廟號信祖祖妣張氏謚曰睿  
恭曾祖諱謚曰明憲廟號僖祖祖妣申氏謚曰明孝祖  
諱謚曰翼順廟號義祖祖妣韓氏謚曰翼敬考謚曰章  
肅廟號慶祖妣王氏謚曰章德六月辛亥以范質及戶  
部侍郎判三司李穀並為中書侍郎同中書門下平章

事竇貞固蘇禹珪罷癸丑范質叅知樞密院事丁巳以  
宣徽北院使翟光鄴為樞密副使秋八月壬戌葬漢隱  
帝於潁陵冬十月丙午漢人來討攻晉州十一月王峻  
及建雄軍節度使王彥超拒之十二月慕容彥超反

二年春正月甲子以侍衛步軍都指揮使曹英為兗州  
行營都部署唐人援兗州屯於汴陽徐州巡檢使張令  
彬擊敗之二月庚寅府州防禦使折德康克奇嵐軍三  
月丁巳朔寒食望祭於郊戊辰以內客省使鄭仁誨為

樞密副使翟光勣罷夏四月丙戌朔日有食之五月庚申東征李穀留守東都鄭仁誨為大內都點檢癸亥次曹州赦流罪以下乙亥克兗州壬午赦兗州六月乙酉朔幸曲阜祠孔子庚子至自兗州秋九月庚午敕北邊吏民毋得入遼境俘掠遼人寇冀州冬十一月癸酉減牛皮稅十二月甲午前靜難節度使侯章進買宴銀絹却之

三年春正月乙卯麟州刺史楊重訓叛於漢來附乙丑

罷戶部營田務除租牛課二月甲子貶王峻為商州司馬三月甲申封子榮為晉王丙戌鄭仁誨罷己丑以棣州團練使王仁鎬為右衛大將軍樞密副使夏四月敕諸道所屬治園園秋七月遼廬臺軍使張藏英來奔九月作郊壇太廟於東都冬十月庚申以馮道為奉迎神主使十二月戊申四廟神主至自西京迎之於西郊祔於太廟帝不豫壬申殺天雄軍節度使王殷乙亥享於太廟



顯德元年春正月丙子朔有事於南郊大赦改元羣臣  
上尊號曰聖明文武仁德皇帝聽蜀境通商戊寅罷鄴  
都丙戌以鎮寧軍節度使鄭仁誨為樞密使壬辰端明  
殿學士戶部侍郎王溥為中書侍郎同中書門下平章  
事王仁鎬罷是日皇帝崩於滋德殿年五十一謚曰聖  
神文武恭肅孝皇帝

新舊紀俱作聖神恭肅文武茲據世宗紀

廟號太祖陵

曰嵩陵

太祖廣順三年顯德一年凡四年

世宗皇帝諱榮本姓柴氏邢州龍岡人也柴氏女適太祖是為聖穆皇后帝為后兄守禮子幼從姑長太祖家太祖遂以為子太祖後稍貴榮亦壯而器貌英奇善騎射略通書史黃老性沉重寡言太祖絕愛之太祖為漢樞密使帝為左監門衛大將軍太祖鎮天雄以帝為天雄軍牙內都指揮使領貴州刺史乾祐三年太祖自魏趣京師留帝守魏太祖即位拜澶州刺史鎮寧軍節度使檢校太傅同中書門下平章事帝素為樞密使王峻

所忌廣順三年正月來朝不得留既而峻有罪誅三月以帝為開封尹封晉王是冬卜以來年正月朔旦有事於南郊而太祖遇疾不能視朝者久之

顯德元年正月丙子郊僅而成禮即以王判內外兵馬事加兼侍中壬辰太祖崩秘不發喪乙未宣遺制丙申皇帝即位於樞前以右監門衛大將軍魏仁浦為樞密副使二月丁卯以馮道為大行皇帝山陵使太常卿田敏為禮儀使兵部尚書張昭為鹵簿使御史中丞張煦

為儀仗使開封少尹權判府事王敏為橋道頓遞使漢人攻潞州三月辛巳大赦癸未以鄭仁誨留守東京乙酉如潞州壬辰次澤州閱兵於北郊癸巳及劉旻戰於高原敗之追及於高平又敗之丁酉帝至潞州己亥侍衛馬軍都指揮使樊愛能步軍都指揮使何徽伏誅壬寅以天雄軍節度使符彥卿為河東行營都部署夏四月乙卯葬太祖皇帝於嵩陵汾州防禦使董希顏叛於漢來附丙辰遼州刺史張漢超叛於漢來附辛酉取嵐

州憲州壬戌立衛國夫人符氏為皇后取石州沁州乙丑馮道薨庚午赦潞州流罪以下如太原忻州監軍李勅殺其刺史趙臯叛於漢來附五月丙子代州守將鄭處謙叛於漢來附遼師救漢丁酉符彥卿及遼人戰於忻口敗績先鋒都指揮使史彥超死之六月乙巳班師乙丑次新鄭遂拜嵩陵庚午至自太原秋七月庚辰閱稼於南御莊癸巳以樞密院直學士工部侍郎景範為中書侍郎同中書門下平章事魏仁浦為樞密使冬十

月甲辰殺左羽林大將軍孟漢瓊

二年春正月浚胡盧河二月庚子朔日有食之

新舊史皆無此

文苑據通鑑輯

求直言夏五月辛未遣宣徽南院使向訓鳳翔

節度使王景伐蜀甲戌大毀佛寺禁民親無侍養而為

僧尼及私自度者六月庚子慮囚秋九月丙寅頒銅禁

閏月癸丑向訓克秦州冬十月辛未取成州階州十一

月乙未以李穀為淮南道行營都部署以伐唐戊申王

景克鳳州十二月丙戌鄭仁誨薨

三年春正月戊戌增築京城庚子詔親征淮南以向訓  
留守東京壬寅車駕發京師辛亥侍衛親軍都指揮使  
李重進及唐人戰於正陽敗之甲寅以重進為淮南道  
行營都招討使二月丙寅如下蔡浮橋壬申克滁州甲  
戌唐主李景來求成不答壬午景使其臣鍾謨來奉表  
丙戌取揚州辛卯取泰州三月庚子以內外馬步軍都  
軍頭袁彥為竹龍都部署是月取光州舒州常州夏四  
月常泰州復入於唐五月乙卯至自淮南赦京師六月

壬申赦淮南秋七月皇后崩揚光舒滁州復入於唐八月乙丑課民種禾及韭戊辰端明殿學士王朴上顯德欽天曆詔自來歲行之九月丙午以王朴為戶部侍郎樞密副使冬十月癸酉李重進敗唐兵於盛唐十一月庚寅廢諸祠不在祀典者乙巳殺李景之臣孫晟十二月壬申以張永德為殿前都點檢

四年春正月己丑朔赦非死罪二月甲戌王朴留守東京乙亥南征三月丁未克壽州夏四月己巳至自壽州



己卯放降卒八百歸於蜀癸未追冊彭城郡夫人劉氏  
為皇后乙酉疏汴水五月丙申殺密州防禦使侯希進  
秋八月乙亥李穀罷以王朴為樞密使癸未蜀人來歸  
我濮州刺史胡立冬十月戊午設制舉諸科己巳王朴  
留守東京以三司使張美為大內都點檢壬申南征十  
二月乙卯泗州守將范再遇叛於唐以其州來降庚申  
濠州團練使郭廷謂以其州來降丁丑取泰州

五年春正月丁亥取海州壬辰取靜海軍丁未克楚州

守將張彥卿鄭昭業死之二月甲寅取雄州丁卯如揚  
州癸酉如瓜州三月壬午如泰州丁亥復如揚州辛卯  
如迎鑒鎮己亥李景請獻廬舒蘄黃等州并鄂州所屬  
漢陽汴川二縣

據陸游南  
唐書輯

於是江北悉平辛亥李景來

買宴浚汴口道河達於淮夏四月庚申祔五室神主於  
新廟壬申至自淮南五月辛巳朔日有食之六月辛未  
放降卒四千六百於唐秋七月乙酉遣水部員外郎韓  
彥卿市銅於高麗丙戌行大周刑統丁亥頒均田圖冬

十月丁酉均河南諸州民租

新紀作括民租茲據舊紀

十一月庚戌

作大周通禮正樂十二月丙戌罷州縣課戶俸戶

六年春二月甲申道汴水入於蔡作律呂新法發粟貸

淮南饑民三月己酉甘州回鶻來獻玉却之庚申王朴

薨丙寅以宣徽南院使吳延祚留守東京癸酉停給銅

魚甲戌北征是月以吳延祚為左驍衛上將軍樞密使

夏四月壬辰取乾寧軍辛丑取益津關以為霸州癸卯

取瓦橋關以為雄州甲辰取莫州五月乙巳朔取瀛州

丙午帝不豫士子車駕南還甲戌至自雄州六月癸未

立皇后符氏封子宗訓為梁王宗讓燕國公

新史宗讓作宗讓據

舊史改

己丑以范質王溥叅知樞密院事魏仁浦同中書

門下平章事以忠武軍節度使趙匡胤為殿前都點檢  
癸巳皇帝崩於滋德殿年三十九謚曰睿武孝文皇帝  
廟號世宗陵曰慶陵

世宗顯德五年

仍太祖年號

恭皇帝諱宗訓世宗第四子也世宗即位大臣請封皇

子為王世宗謙抑久之及北取三關遇疾還京師始封  
帝為梁王時年七歲

顯德六年六月癸巳世宗崩甲午宣遺詔皇帝即位於  
樞前癸卯以范質為大行皇帝山陵使翰林學士竇儼  
為禮儀使兵部尚書張昭為鹵簿使御史中丞邊歸謙  
為儀仗使宣徽南院使判開封府事咎居潤為橋道頓  
遞使秋七月壬戌以趙匡胤領歸德軍節度使李重進  
領淮南節度使侍衛親軍副都指揮使韓通領天平軍

節度使丙寅大赦八月壬午昭義軍節度使李筠加檢校太尉庚寅封弟熙讓為曹王熙謹紀王熙誨蘄王己亥加前司空李穀開府儀同三司九月丙寅左驍衛大將軍戴交使於高麗冬十一月壬寅葬睿武孝文皇帝於慶陵

七年春正月辛丑朔鎮州定州言有北寇趙匡胤以大軍北征癸卯發京師甲辰匡胤返兵入京師韓通死之皇帝遜位於匡胤匡胤廢帝為鄭王宋開寶六年三月

乙卯崩於房州謚之曰恭皇帝陵曰順陵

恭帝顯德一年

仍世宗年  
號稱七年

右周三帝合十年



欽定續通志卷二十四

欽定四庫全書

史部

欽定續通志卷二十八

五至

主事臣尹壯圖覆勘

總校官原任侍講臣王燕緒



欽定四庫全書

欽定續通志卷五十五

宋紀

太祖

太祖皇帝姓趙氏諱匡胤其先封趙城因以為氏  
漢京兆尹廣漢居涿郡遂世為涿郡人高祖肱仕  
唐為縣令曾祖珽歷藩鎮從事兼御史中丞祖敬  
歷營州三州刺史敬生弘殷唐莊宗時典禁軍

漢乾祐中以討王景崇功

宋史作王景據五代史增輯

遷護聖

都指揮使周顯德中從征淮南平揚州加檢校司徒封天水縣男是為宣祖帝宣祖次子也母曰昭憲皇后杜氏帝容貌雄偉氣度豁如周太祖以樞密使征李守貞太祖應募居帳下廣順初補東西班行首歷開封府馬直軍使世宗即位以太祖典禁軍從世宗戰高平大敗北漢兵還拜殿前都虞候領嚴州刺史從征淮南首敗唐人於渦口唐將皇甫暉

姚鳳以衆十五萬塞清流關太祖引兵出山後暉等大驚退入滁州太祖追至城下暉請成列以決勝負太祖許之暉整陣出太祖擁馬項直入手刃暉中腦并姚鳳禽之逆克滁州時宣祖為馬軍副都指揮使率兵夜半至城下傳呼開門太祖曰父子雖至親城門啟閉王事也不敢奉命詰旦宣祖乃得入韓令坤下揚州南唐援兵大至令坤將棄城避之世宗命太祖將兵屯六合太祖下令曰揚州兵敢有過六合者斷其足自是令坤始

固守太祖尋敗唐齊王景達於六合東進殿前都指揮使尋拜定國軍節度使四年從征壽春遂下壽州徙義成軍節度使檢校太保仍殿前都指揮使復從征濠泗為前鋒時南唐設砦於十八里灘世宗方議以索駝濟師太祖獨躍馬截流先渡麾下騎隨之遂破其砦乘勝攻泗州下之進拔楚州大敗唐人於鑾江口直抵南岸焚其營柵又破之於瓜步淮南平五年徙忠武軍節度使六年從世宗北征為水陸都部署克瓦橋關降其守

將姚內斌遂定莫州世宗在道聞文書於韋囊中得木  
版題云點檢作天子異之時張永德為點檢世宗不豫  
還京師即拜太祖檢校太傅殿前都點檢以代永德恭  
帝即位徙歸德軍節度使檢校太尉七年春或告北漢  
結遼人入寇太祖出師禦之次陳橋驛夜五鼓軍士集  
驛門宣言策點檢為天子遲明逼寢所太宗與趙普入  
帳中密白其事露刃列於庭有以黃衣加太祖身者眾  
皆羅拜呼萬歲

謹按通鑑輯覽

御批陳橋兵變論者疑宋祖實與其謀蓋彼時匡義以手足之親趙善以心腹之寄毅然部分復入帳中密白使非微窺宋祖隱微豈至若此且其受命而出因變而返遽行禪代絕無愧辭更足改後人訾議雖當時朝不易位市不易肆其後布武修文撥亂反正而其得國之不以道人豈能曲為原諒哉 即掖太祖上馬太祖

謂諸將曰我有號令爾等能從乎皆下馬曰唯命太祖曰太后主上吾所北面事者汝輩不得驚犯大臣皆我比肩朝廷府庫及士庶之家不得侵掠違者吾不貸也諸將皆再拜肅隊南行自仁和門入副都指揮使韓通謀禦之散員都指揮使王彥昇先入京逐通殺之太祖

進登明德門令甲士歸營遂返點檢公署有頃諸將擁  
宰相范質等至太祖見之嗚咽流涕曰違負天地乃至  
於此質等未及對列校羅彥瓌等按劍厲聲曰我輩無  
主今日須得天子質等相顧遂巡降階拜日晡班定翰  
林學士承旨陶穀出周恭帝禪位制書於袖中宣徽使  
引太祖就庭北面拜受已乃掖太祖升崇元殿即皇帝  
位是日遷恭帝及符后於西宮降封恭帝曰鄭王而尊  
符后為周太后

建隆元年春正月乙巳大赦改元定有天下之號曰宋  
加恩中外及貶降流配者遣使徧告郡國戊申贈韓通  
中書令以禮收葬辛亥論翊戴功以周義成軍節度使  
殿前都指揮使石守信為歸德軍節度使侍衛親軍馬  
步軍副都指揮使寧江軍節度使侍衛親軍馬軍都指  
揮使高懷德為義成軍節度使殿前副都點檢宋史寧江軍作  
江寧軍考五代無江寧軍茲據東都事畧改下張光翰之寧江軍同武信軍節度使侍衛  
親軍步軍都指揮使張令鐸為鎮安軍節度使侍衛親



軍馬步軍都虞候殿前都虞候王審琦為泰寧軍節度使殿前都指揮使虎捷右廂都虞候張光翰為寧江軍節度使侍衛親軍馬軍都指揮使龍捷右廂都指揮使趙彥徽為武信軍節度使侍衛親軍步軍都指揮使其餘領軍者並進爵乙卯遣使分振諸州丁巳命周宗正郭玘祀周陵廟仍以時祭享癸亥以周天雄軍節度使魏王符彥卿守太師雄武軍節度使王景守太保太原王定難軍節度使守太傅西平王李彝殷守太尉荆南

節度使高保融守太傅餘領節鎮者並進爵甲子賜弟  
殿前都虞候匡義名光義已巳立太廟成德軍節度使  
郭崇報北漢及遼師竟不出二月乙亥尊母南陽郡夫  
人杜氏為皇太后以周宰相范質依前守司徒兼侍中  
王溥守司空兼門下侍郎魏仁浦為尚書右僕射兼中  
書侍郎並同中書門下平章事樞密使吳廷祚同中書  
門下二品唐寅賜進士楊礪等十九人及第出身宋史無此  
條今據宏簡錄首著三月丙辰南唐主李景吳越王錢  
於此自後歷不復著

倣遣使來賀壬戌定國運以火德王色尚赤臘用戌癸  
亥命武勝軍節度使宋延渥等率舟師巡江徼夏四月  
癸酉竇儼上二舞十二樂曲名樂章丙戌浚蔡河癸巳  
周昭義軍節度使李筠拒命遣歸德軍節度使石守信  
討之五月己亥朔日有食之庚子以昭化軍節度使慕容  
延釗彰德軍節度使王全斌將兵出東道會守信討  
李筠壬寅竇儼上太廟舞曲名癸卯石守信敗李筠於  
長平己酉西京作周六廟戊丁巳下詔親征以樞密使

吳廷祚留守上都都虞候光義為大內都點檢命天平  
軍節度使韓令坤將兵屯河陽己未發京師丁卯石守  
信高懷德破李筠於澤州六月辛未拔澤州筠自焚死  
甲申免澤州今歲祖乙酉進攻潞州丁亥筠子守節以  
城降辛卯大赦錄死事者子孫丁夫給復三年甲午永  
安軍節度使折德辰破北漢於沙谷若秋七月戊申上  
至自潞甲子遣工部侍郎艾穎拜嵩慶陵乙丑南唐遣  
使者來賀平澤潞八月壬午以光義領泰寧軍節度依

前殿前都虞候甲申立琅琊郡夫人王氏為皇后九月  
壬寅昭義軍節度使李繼勳焚北漢平遙縣丙午追謚  
高祖曰文獻皇帝廟號僖祖妣崔氏曰文懿皇后曾祖  
曰惠元皇帝廟號順祖妣桑氏曰惠明皇后祖曰簡恭  
皇帝廟號翼祖妣劉氏曰簡穆皇后皇考曰武昭皇帝  
廟號宣祖己未周淮南節度使李重進拒命遣石守信  
討之冬十月乙酉晉州兵馬鈐轄荆罕儒襲北漢汾州  
死之丁亥詔親征揚州以光義為大內都部署吳廷祚

權上都留守庚寅發京師十一月丁未攻揚州拔之重  
進自焚死戊申命諸軍習戰艦於迎鑾乙卯南唐主遣  
使來犒師庚申遣其子從鎰來朝十二月丁亥帝至自  
揚州辛卯泉州節度使留從效稱藩

二年春正月庚子占城國遣使者來壬寅幸造船務觀  
習水戰丁巳導蔡水入潁甲子澤州刺史張崇誥坐黨  
李重進棄市二月壬申疏五丈河己丑定竊盜律夏四  
月癸巳朔日有食之壬寅詔郡國置前代帝王賢臣陵

冢戶已酉無棣男子趙遇詐稱皇弟伏誅己未商河縣  
令李瑤坐贓杖死庚申班私鹽及私造酒麴律五月癸  
亥以皇太后疾赦雜犯死罪己下丙寅三佛齊國遣使  
者來丁丑以安邑解兩池鹽給徐宿鄆濟庚寅供奉官  
李繼昭坐盜賣官船棄市六月甲午皇太后崩庚申釋  
服秋七月壬申以光義為開封府尹光美行興元尹八  
月壬寅詔諸大辟送所屬州軍決判甲辰南唐主李景  
卒子煜嗣遣使請追尊帝號許之己酉削易定節度使

同平章事孫行友官辛亥女真國遣使者來永濟主簿  
郭顗坐賊棄市庚申周世宗實錄成九月甲子遼解利  
來降荆南節度使高保勗遣其弟保寅來朝冬十月癸  
巳南唐遣使來會皇太后葬戊戌禁邊民盜塞外馬十  
一月己巳如相國寺遂如國子監癸酉沙州節度使曹  
元忠瓜州團練使曹延繼等遣使者來十二月壬申回  
鶻可汗景瓊遣使者來乙未李繼勲敗北漢軍於遼州  
辛丑如新修河倉庚戌改於近郊



三年春正月己巳振淮南饑甲戌廣皇城詔郡國長吏  
勸民播種癸未如國子監二月丙辰復如國子監遂如  
迎春苑己亥更定竊盜律甲寅北漢寇潞州守將擊走  
之三月己巳詔郡國犯大辟者刑部審覆丁亥命徙北  
漢降人於邢洺夏四月乙巳追冊夫人賀氏為皇后五  
月甲子如相國寺禱雨遂如迎春苑乙亥開太行運路  
癸未命使檢諸州旱甲申詔均戶役復如相國寺禱雨  
六月辛卯振宿州饑癸巳以吳廷祚為雄武軍節度使

罷己亥減京畿河北死罪以下壬子蕃部尚波于等犯  
渭北知秦州高防擊走之乙卯如迎春苑秋七月壬戌  
放南唐降卒歸其國乙丑免舒州蕪湖新稅丁卯索內  
外軍不律者配沙門島己卯北漢捉生指揮使路貴等  
來降辛巳遣從臣檢河北旱八月癸巳蔡河務綱官王  
訓等四人坐以糠土雜軍糧磔於市乙未詔凡行賂獲  
薦者許告許舉書判拔萃科九月庚午吐蕃尚波于等  
歸伏羗縣地冬十月丙戌如太清觀遂如造船務觀習

水戰已亥如岳臺命諸軍習騎射復如玉津園辛丑以  
樞密副使趙普為樞密使辛亥畋於近郊十一月癸亥  
詔縣令考課以戶口增減為黜陟己卯畋於近郊壬午  
賜南唐建隆四年曆十二月戊戌振蒲晉慈隰相衛六  
州饑庚子班捕盜令是歲周鄭王出居房州

乾德元年春正月定制以文臣知州縣係以京銜己卯  
發闕西鄉兵赴慶州丁巳修畿內河隄衡州刺史張文  
表叛庚申遣山南東道節度使慕容延釗討之己丑如

造船務觀造戰船甲戌詔荆南發兵會討張文表三月  
壬辰朗州周保權將楊師璠擒文表殺之甲午慕容延  
釔入荆南高繼沖請歸朝得州三縣十七乙未克潭州  
辛亥振澶滑衛魏晉絳蒲孟八州饑三月癸酉班定新  
律戊寅慕容延釔攻岳州下之遂克朗州獲周保權以  
歸湖南平得州十四監一縣六十六夏四月甲申減荆  
南朗州潭州管内死罪乙酉遣使祭南岳丁亥如國子  
監遂如武成王廟宴射於玉津園庚寅鑿習戰池辛卯

建隆應天歷成癸卯辰錦叙等州歸順甲辰疏三門禁  
涇原邠慶等州補蕃人為邊鎮將乙巳如玉津園閱諸  
軍騎射丙午免湖南茶稅禁陝州鹽井辛亥貸澶州民  
種食五月庚午給荆南管內符印六月乙未詔荆南兵  
願歸農者聽已酉命習水戰於新池秋七月丁巳安國  
軍節度使王全斌等率師入太原境以俘來獻己未詔  
民有疾而親屬遺去者罪之丁卯如新池觀習水戰己  
巳免荆南管內夏稅之半乙亥免朗州管內夏稅己卯班

重定刑統等書八月丁亥王全斌攻北漢樂平縣降之  
丙申北漢靜陽十八砦首領來降泉州陳洪進遣使者  
來已亥遼幽州岐溝關使柴廷翰等來降丁卯宣徽  
南院使兼樞密副使李處耘責授淄州刺史戊寅北漢  
引遼人攻平晉遣洺州防禦使郭進等救之冬十月己  
亥攻於近郊丁未吳越國王進郊祀禮金銀器幣以萬  
計十一月甲子有事於南郊大赦改元羣臣上尊號曰  
應天廣運仁聖文武至德皇帝丙寅南唐進賀南郊尊

號銀絹以萬計乙亥畋於近郊十二月辛巳開封府尹  
光義興元尹光美以下各益食邑賜號易封進階勳爵  
邑甲申皇后王氏崩己巳南唐主上表乞呼名不允  
二年春正月辛巳諭郡國長吏勸農耕作癸未如迎春  
苑宴射甲申詔著四時聽選式戊子范質王溥魏仁浦  
罷庚寅以趙普為門下侍郎同中書門下平章事李崇  
矩為樞密使二月戊申北漢遼州刺史杜延韜以城來  
降癸丑振陝州饑導渙水入京庚午永安軍節度使折

德辰俘北漢衛州刺史楊璘來獻甲戌浚汴河三月辛巳如教船池賜水軍將士衣有差還乙未北漢耀州團練使周審玉等來降丁酉遣使祈雨於五嶽夏四月丁未策賢良方正直言極諫科戊申振河中饑己酉免諸道今年夏稅之無苗者乙丑始置叅知政事以兵部侍郎薛居正呂餘慶為之己巳轉粟振靈武饑六月己酉以光義為中書令光美同中書門下平章事子德昭貴州防禦使秋七月辛巳如新池觀習水戰乙未如北郊



觀稼辛丑太子太傅范質薨壬寅潘美等克柳州冬十月戊申周紀王熙謹薨十一月甲戌以忠武軍節度使王全斌為西川行營前軍兵馬都部署武信軍節度使彥進副之將步騎三萬出鳳州道寧江軍節度使劉元義為西川行營前軍兵馬都部署樞密承旨曹彬副之將步騎二萬出歸州道以伐蜀壬辰畋於近郊十二月戊申拔夔州丁巳蠲歸峽二州秋稅辛酉克興州連拔石圖等二十餘砦辛未畋於近郊

三年春正月甲戌王全斌克劍門禽蜀樞密使王昭遠  
等壬午拔利州乙酉蜀主孟昶降得州四十五縣一百  
九十八蜀平癸巳劉光義克萬施開忠四州丙申免蜀  
管內逋賦及夏稅二月庚申王全斌殺蜀降兵二萬七  
千人於成都三月癸酉詔置義倉是月兩川盜起先鋒  
都指揮使高彥暉死之詔所在攻討夏四月癸丑職方  
員外郎李岳坐贓棄市五月乙亥遣開封尹光義勞孟  
昶於玉津園戊子大赦減死罪六月甲辰以孟昶為中

書令秦國公庚戌孟昶薨秋七月珍州刺史田景遷內  
附八月戊戌詔籍郡國驍勇兵送闕下戊午殿直成德  
鈞坐賊棄市九月己巳聞諸道兵以騎軍為驍雄步軍  
為雄武並隸親軍冬十月己未太子中舍王治坐受賊  
殺人棄市

四年春正月丁亥命丁德裕等率兵巡撫西川二月安  
國軍節度使羅彥瓌等敗北漢於靜陽甲子免西川今  
年夏稅及諸徵之半田不得耕者盡除之三月癸酉罷

義倉夏四月壬子罷光州貢鷹鷄丁巳遼天德軍節度使于延起來降五月甲戌光祿少卿郭玘坐賊棄市丁丑詔蜀郡敢有不省父母疾者罪之秋七月戊辰西南夷首領董勗等內附庚辰罷劍南蜀米麥征免華州今歲租給州縣官奉戶閏八月乙亥詔民能樹藝開墾者不加征令佐能勸來者受賞冬十月辛酉命太常復二舞癸亥詔諸郡立古帝王陵廟置戶有差

五年春正月甲寅王全斌等坐伐蜀黠貨殺降全斌責

崇義軍節度使崔彥進責昭化軍節度使王仁贍責右衛  
大將軍丁巳賞伐蜀功曹彬劉光義等進爵有差二月庚  
申如造船務遂如城西觀衛士騎射甲子以薛居正呂餘  
慶並為吏部侍郎依前叅知政事丙午以趙普為尚書左  
僕射兼門下侍郎同中書門下平章事李崇矩檢校太傅  
丙辰北漢石盆砦招收指揮使閻章以砦來降夏五月  
乙巳賜京城貧民衣北漢鴻唐砦招收指揮使樊暉以  
砦來降六月戊午朔日有食之辛巳如建隆觀遂如飛

龍院秋七月己酉免水旱災戶今歲租九月壬辰倉部  
員外郎陳郾坐贓棄市己酉畋於近郊十一月乙酉工  
部侍郎毋守素坐居喪娶妾免供奉武仁海坐枉殺人  
棄市十二月趙普以毋憂去位丙子起復

開寶元年春正月甲午增治京城振陝之集津絳之垣  
曲懷之武陟等縣己亥北漢偏城砦招收指揮使任思  
等來降三月庚寅班縣令尉捕盜令夏五月丁未賜南  
唐米麥十萬斛六月癸丑詔民田為霖兩河水壞者免

今年夏稅癸亥詔荊蜀民祖父母父母在者子孫不得  
別財異居秋七月丙申如鐵騎營北漢潁州砦主胡遇  
等來降丙午如鐵騎營遂如玉津園北漢主劉鈞卒養  
子繼恩立八月乙卯按鵠於近郊還如相國寺戊午又  
按鵠於北郊還如飛龍院戊辰命昭義軍節度使李繼  
勳等征北漢昭義宋史作昭化考昭化乃利州軍名非潞州也茲據李繼勳傳改九月辛  
巳禁錢出塞庚子李繼勳敗北漢於銅溫河己酉北漢  
供奉官侯霸榮弑其主繼恩繼恩弟繼元立冬十月己

未改於近郊還如飛龍院十一月癸卯有事於南郊改  
元大赦十惡殺人官吏受贓者不原羣臣上尊號曰應  
天廣運大聖神武明道至德仁孝皇帝

二年春二月乙卯以昭義軍節度使李繼勲為河東行  
營前軍都部署侍衛步軍指揮使党進副之宣徽南院  
使曹彬為都監棣州防禦使何繼筠為石嶺關部署建  
雄軍節度使趙贊為汾州路部署以伐北漢命彰德軍  
節度使韓仲贇為北面都部署彰義軍節度使郭延義



副之以防遼寇戊午下詔親征已酉以開封尹光義為  
上都留守樞密副使沈義倫為大內部署判留司三司  
事甲子癸京師乙亥駐潞州三月壬辰癸潞州乙未李  
繼勲敗北漢軍於太原城下戊戌駕至太原庚子觀兵  
於城南築長連城癸卯北漢史昭文以憲州來降乙巳  
壅汾水灌太原決晉祠水注之辛亥遣海州刺史孫方  
進率兵圍汾州夏四月遼師救北漢己未何繼筠敗之  
於陽曲五月癸未韓仲贇又敗之於定州北甲午北漢

趙文度以嵐州來降閏月壬子議班師已未遷河東民  
萬戶於山東壬戌師還六月癸巳至自太原曲赦京城  
囚秋七月丁巳如封禪寺詔鎮深趙邢洺五州管内鎮  
砦縣悉城之冬十月戊子畋於近郊庚寅散指揮都知  
杜延進等謀反伏誅十一月甲寅畋於近郊

三年春正月辛酉詔民五千戶舉孝弟彰聞德行純茂  
者一人奇才異行不拘此限仍為治裝詣闕三月庚戌  
賜進士十五舉以上司馬浦等一百六人並本科出身

辛亥賜處士王昭素國子博士致仕夏四月辛未朔日  
有食之己亥罷河北諸州鹽禁及郡國所貢非其土產  
者五月丁未禁京城民畜兵器秋七月己巳立報水旱  
期式九月己亥以潭州防禦使潘美為貴州道兵馬行  
營都部署朗州團練使尹崇珂副之發十州兵會賀州  
以伐南漢甲辰詔周文成康三王秦始皇漢高文景武  
元成哀七帝後魏孝文西魏文帝後周太祖唐高祖太  
宗中宗肅宗代宗德順文武宣懿僖昭諸帝凡二十七

陵常被盜發者所在有司備法服常服具棺槨重葬長  
吏致祭丁卯潘美等克富州十月庚辰克賀州十一月  
壬寅下昭桂二州乙巳滅桂陽歲貢金額癸丑右領軍  
衛將軍石延祚坐賊棄市癸亥定州駐泊都監田欽祚  
敗遼於遂城十二月壬申潘美等克連州辛卯克韶  
州

四年春正月丙午罷諸道州縣攝官丁未右千牛衛大  
將軍桑進興坐賊棄市癸丑潘美等取英州雄州二月

丁亥南漢主劉鋹遣使以表來上己丑潘美克廣州劉  
鋹出降廣南平得州六十縣二百十四辛卯大赦廣南  
免二稅其偽署官仍舊三月丙申免廣南買人男女為  
奴婢轉傭利者夏四月己巳禁嶺南商稅鹽麴如荆湖  
法癸未如開寶寺焚廟軍修前代陵寢之在秦者壬辰  
監察御史閻邱舜卿坐前盜用官錢棄市五月乙未朔  
御明德門受劉鋹俘釋之誅其嬖臣龔澄樞李托薛崇  
譽等丁酉賞伐廣南功潘美尹崇珂等進爵有差六月

封劉銀為恩赦侯乙酉罷賀州銀場冬十月癸亥朔日  
有食之庚午太子洗馬王元吉坐賊棄市辛巳除廣南  
無名配斂甲申詔自十月後凡犯強竊盜者郊赦不原  
丙戌放廣南民毆充軍者十一月癸巳南唐主煜表乞  
去國號呼名許之己未有事於南郊大赦十惡故劫殺  
官吏受贓者不原壬戌蜀班內殿直四十人援御馬直  
例乞賞誅之十二月癸亥朔賜南郊執事官器幣有差  
己巳内外文武官遞進勲爵益食邑

自後凡南郊成禮  
例有爵賞亦不備

著  
壬午敗於近郊

五年春正月乙巳罷襄州歲貢魚二月丙子詔沿河十七州各置河隄判官庚寅以兵部侍郎劉熙古叅知政事三月壬申如教船池習戰乙酉殿中侍御史張穆坐贓棄市夏四月丙午遣使檢視水災田丙寅遣使如諸州捕虎五月丙寅罷嶺南採珠媚川都卒為靜江軍辛未遣潁州團練使曹翰往濮州塞決河甲戌以霖雨出後宮五十餘人六月丁酉詔淫雨河決沿河民田有為

水害者有司以聞除其租秋七月己未右拾遺張恂坐  
賊棄市邕容等州獠反八月己亥廣州行營都監朱憲  
大破獠賊於容州九月丁巳朔日有食之癸酉李崇矩  
罷為鎮國軍節度使冬十一月己未李繼明藥繼清大  
破獠賊於英州癸亥禁僧道習天文地理庚辰以叅知  
政事薛居正呂餘慶兼淮湖嶺蜀轉運使十二月己亥  
畋於近郊

六年春二月丙戌棣州兵馬殿直傅延翰謀反伏誅丙



申振曹州饑三月乙卯周鄭王殂於房州帝素服發哀  
輟朝十日謚之曰恭帝命還葬慶陵之側陵曰順陵夏  
四月丙午黎州保塞蠻來歸戊申詔修五代史五月庚  
申劉熙古罷己巳交州丁璉遣使貢方物如玉津園觀  
刈麥辛巳赦右拾遺馬適六月隰州巡檢使李謙溥拔北  
漢七砦庚戌詔叅知政事與宰相分知印押班奏事秋  
七月丙辰減廣南無名率錢八月乙酉罷成都府偽蜀  
嫁裝稅甲辰趙普罷為河陽三城節度使同平章事辛

酉如都亭驛九月丁卯呂餘慶罷為尚書左丞己巳封  
光義為晉王兼侍中德昭同中書門下平章事薛居正  
為門下侍郎沈義倫為中書侍郎同平章事石守信兼  
侍中盧多遜為中書舍人叅知政事壬申詔晉王光義  
班宰相上冬十月丁亥如玉津圍觀稼甲辰特赦諸官  
吏姦賊十二月丙午前中書舍人叅知政事多遜起復  
視事行開寶通禮

七年春正月癸亥左拾遺秦亶太子中允呂鵠並坐贓

宥死杖除名二月庚辰朔日有食之乙巳太子中舍胡  
德冲坐隱官錢棄市夏四月丙午遣使檢嶺南民田五  
月乙丑詔市二價者以枉法論丙寅如講武池觀習水  
戰丙子又如講武池六月丙申振河中府饑秋七月壬  
子如講武池觀習水戰丙辰南丹州溪洞酋帥莫洪燕  
內附庚午太子中允李仁友坐不法棄市八月丁亥諭  
吳越伐江南己丑如講武池賜習水戰軍士錢戊戌殿  
中丞趙象坐擅稅除名甲辰如講武池觀習水戰九月

癸亥以宣徽南院使義成軍節度使曹彬為西南路行營馬步軍戰權都部署山南東道節度使潘美為監潁州團練使曹翰為先鋒都指揮使以伐江南丁卯以知制誥李穆為江南國信使冬十月甲申如迎春苑登汴隄觀戰艦東下丙戌又如迎春苑登汴隄觀諸軍習戰遂如東水門發戰權東下壬辰曹彬等將舟師步騎發江陵水陸並進丁酉命吳越王錢俶為昇州東南行營招撫制置使己亥曹彬收下峽口閏月己酉克池州丁

已敗江南軍於銅陵壬戌彬等拔蕪湖當塗兩縣駐軍  
采石癸亥詔減湖南新製茶甲子薛居正等上五代史  
丁卯彬敗江南軍於采石十一月丁亥免蒲陝晉絳同  
解六州通賦關西諸州免其半己丑知漢陽軍李恕敗  
江南水軍於鄂甲午曹彬敗江南軍於新竹若十二月  
己酉彬敗江南軍於白鷺洲甲子吳越王帥師圍常州  
尋拔利城砦丙寅彬敗江南軍於新林港庚午北漢寇  
晉州守臣武守琦敗之於洪洞壬申吳越王敗江南軍

於常州北界

八年春正月丙子知池州樊若水敗江南軍於州界田  
欽祚敗江南軍於溧水庚寅曹彬拔昇州城南水砦二  
月癸丑彬敗江南軍於白鷺洲乙卯拔昇州關城甲子  
知揚州侯陟敗江南軍於宣化鎮三月庚寅彬敗江南  
軍於江北己亥遼遣使者來議和知滁州葉繼能拔北  
漢鷹澗堡夏四月乙巳如東水碓癸丑如都亭驛聞新  
戰船丁巳吳越王拔常州壬戌彬等敗江南軍於秦淮

北戊辰如玉津園觀種稻遂如講武池觀習水戰庚午  
詔嶺南盜賊滿十貫以上者死五月壬申朔吳越國王  
錢俶守太師尚書令益食邑甲申江南寧遠軍及沿江  
砦並降乙酉武岡長沙等十縣民為賊鹵掠者者蠲其  
逋租仍給復一年六月丁未宋州觀察判官崔絢錄事  
叅軍馬德休並坐賊棄市秋七月辛未朔日有食之庚  
辰遣閤門使郝崇信太常丞呂端使於遼癸未西天東  
印土王子穰結說囉來朝獻甲申詔吳越王班師己亥

山後兩林鬼主懷化將軍勿尼等來朝獻八月乙卯如東水磴觀魚遂如北園辛酉詔權停今年貢舉壬戌遼遣使者來九月壬申畋於近郊戊寅潤州降冬十月己亥江南主遣使來乞緩師辛亥詔郡國令佐察民有孝悌力田奇材異行或文武可用者遣詣闕丁巳江南主貢銀五萬兩絹五萬匹乞緩師己未曹彬遣都虞候劉遇破江南軍於皖口十一月辛未江南主遣使再奉表乞緩師不報丙戌以校書郎宋準殿直邢文慶充賀遼



正旦使乙未曹彬克昇州李煜出降江南平凡得州十  
軍三縣一百八十二月庚子如惠民河觀築堰辛丑  
赦江南免一歲租兵戈所經二歲辛亥免開封府今年  
租十之三己未以恩赦侯劉鋹為彭城郡公甲子遼使  
來賀正旦丁卯吳越國王乞以長春節入朝許之

九年春正月辛未御明德門見李煜免其獻俘壬申大  
赦減死罪一等乙亥封李煜為違命侯己卯江南昭武  
軍節度使留後盧絳焚掠州縣二月庚戌以曹彬為樞

密使辛亥命德昭迎勞吳越國王於宋州遼使來賀長  
春節戊午以盧多遜為吏部侍郎仍叅知政事己未吳  
越國王錢俶偕子惟濬等朝於崇德殿賜俶衣帶鞍馬  
以禮賢宅居之壬戌錢俶進賀平昇州銀絹等物甲子  
召晉王吳越國王并其子等射於苑中丁卯如禮賢宅  
賜俶金器及銀絹三月己巳俶進助南郊銀絹庚午賜  
俶劍履上殿詔書不名癸酉以皇子德芳為檢校太保  
貴州防禦使中書侍郎同平章事沈義倫為大內都部

署右衛大將軍王仁贍權判留司三司兼知開封府事  
丙子如西京己卯次鞏縣拜安陵庚辰賜河南府民今  
年田租之半奉陵戶一年辛巳至洛陽辛卯如廣化寺  
開無畏三藏塔夏四月庚子有事於圓丘大赦十惡故  
殺者不原貶降責免者量移叙用諸流配及逋欠悉放  
丙午駕發西京辛亥至自西京丁巳曹翰拔江州屠之  
益晉王食邑光美德昭並加開府儀同三司德芳益食  
邑薛居正沈義倫加光祿大夫樞密使曹彬宣徽北院

使潘美加特進吳越國王錢俶益食邑内外文武官咸  
進階封己未著令旬假為休沐五月己巳如東水碓遂  
如飛龍院觀漁金水河甲戌殺盧絳庚辰如講武池遂  
如玉津園觀稼甲申以閣門副使田守奇等充賀遂生  
辰使秋七月丁亥命修先代帝王及五嶽四瀆祠廟八  
月己未吳越國王進射火箭軍士己亥如新龍興寺辛  
丑太子中允郭思齊坐贓棄市己巳如等覺院遂如東  
築院及控鶴營觀習射又如開寶寺觀藏經丁未遣侍

衛馬軍都指揮使党進宣徽北院使潘美伐北漢九月  
甲子如綾錦院庚午党進敗北漢軍於太原城北辛巳  
命忻代行營都監郭進遷山後諸州民庚寅如城南池  
亭遂如禮賢宅冬十月丁酉兵馬監押馬繼恩攻河東  
四十餘砦破之己亥如西教場庚子鎮州巡檢郭進焚  
河東壽陽縣辛丑党進敗北漢軍於太原城北癸丑帝  
不豫是夕晉王光義入侍已而帝崩年五十諡曰英武  
聖文神德皇帝加謚啟運立極英武睿文神德聖功至

明大孝皇帝廟號太祖陵曰永昌陵

太祖建隆三年

其元年即周顯德七年

乾德五年開寶九年

凡十七年

欽定續通志卷二十五